



বাংলাদেশ কৃষি উন্নয়ন কর্পোরেশন (বিএডিসি)

কৃষি ভবন

৪৯-৫১ দিলকুশা বাণিজ্যিক এলাকা, ঢাকা - ১০০০

জনসংযোগ বিভাগ

www.badc.gov.bd

কৃষিই সমৃদ্ধি

স্মারক নং-১১৩

তারিখ: ২৭ নভেম্বর ২০১৬

সংবাদ বিজ্ঞপ্তি

বিএডিসি'র ৫৫তম প্রতিষ্ঠা বার্ষিকী উপলক্ষ্যে আলোচনা সভা ও সাংস্কৃতিক অনুষ্ঠান

বাংলাদেশ কৃষি উন্নয়ন কর্পোরেশন (বিএডিসি) এর ৫৫তম প্রতিষ্ঠা বার্ষিকী উপলক্ষ্যে ২৪ নভেম্বর ২০১৬ তারিখ দিলকুশাস্থ বিএডিসি'র সদর দপ্তর কৃষি ভবনে এক আলোচনা সভা ও সাংস্কৃতিক অনুষ্ঠানের আয়োজন করা হয়। 'বদলে যাচ্ছে জলবায়ু বদলে যাচ্ছে কৃষি, টেকসই কৃষি উপকরণ যোগান দিবে বিএডিসি' এ প্রতিপাদ্যকে সামনে রেখে বিভিন্ন কর্মসূচি যথা- কার্যক্রম প্রদর্শনী, রক্তদান কর্মসূচি, সংস্থার ডে-কেয়ার সেন্টার উদ্বোধন করা হয়। উক্ত অনুষ্ঠানে প্রধান অতিথি হিসেবে উপস্থিত ছিলেন অগ্নিকন্যা, গণপ্রজাতন্ত্রী বাংলাদেশ সরকারের সফল কৃষিমন্ত্রী জনাব মতিয়া চৌধুরী এমপি, অনুষ্ঠানে বিশেষ অতিথি হিসেবে কৃষি মন্ত্রণালয় সম্পর্কিত সংসদীয় স্থায়ী কমিটির মাননীয় সভাপতি জনাব মোঃ মকবুল হোসেন এমপি, কৃষি সচিব জনাব মোহাম্মদ মঈনুদ্দিন আবদুল্লাহ, সংসদ সদস্য বেগম মুনুজান সোফিয়ান উপস্থিত ছিলেন। সভায় সভাপতিত্ব করেন সংস্থার চেয়ারম্যান জনাব মোঃ নাসিরুজ্জামান। সভায় মহাব্যবস্থাপক (বীজ) জনাব মোঃ নূর মোহাম্মদ মন্ডল, প্রধান প্রকৌশলী (ক্ষুদ্রসেচ) জনাব মোঃ কামরুজ্জামান, বিএডিসি অফিসার্স এসোসিয়েশনের সভাপতি জনাব মোঃ মিজানুর রহমান, উপপরিচালক (বীপ্রকে) জনাব মোঃ মুকসুদ আলম খান (মুকুট) ও বিএডিসি'র সিবিএ'র সভাপতি জনাব মোঃ কুতুব উদ্দিন বক্তব্য প্রদান করেন। উল্লেখ্য, বাংলাদেশ কৃষি উন্নয়ন কর্পোরেশন (বিএডিসি), তদানিন্তন পূর্ব পাকিস্তান কৃষি উন্নয়ন কর্পোরেশন নামে কৃষি উন্নয়ন কর্পোরেশন অধ্যাদেশ, ১৯৬১ এর মাধ্যমে প্রতিষ্ঠিত হয়। প্রতিষ্ঠানটি ২০১৬ সালের ১৬ অক্টোবর প্রতিষ্ঠার ৫৫ তম বর্ষ পূর্ণ করেছে।

মাননীয় কৃষিমন্ত্রী প্রধান অতিথির বক্তৃতায় বলেন, বর্তমান সরকার কৃষি উন্নয়নের মাধ্যমে দেশের আপামর জনগণের খাদ্য নিরাপত্তা নিশ্চিত ও গ্রামীণ জনগোষ্ঠীর দারিদ্র্য বিমোচনে অঙ্গীকারাবদ্ধ। এ লক্ষ্যে পরিবর্তিত বিশ্ব প্রেক্ষাপট বিবেচনায় নিয়ে নিজস্ব খাদ্য নিরাপত্তা নিশ্চিত করা, কৃষকদের উৎপাদিত পণ্যের ন্যায্য মূল্য নিশ্চিতকরণ, প্রতিকূলতা সহিষ্ণু জাত উদ্ভাবনের পাশাপাশি সরকারিভাবে হাইব্রিড জাত উদ্ভাবন ও সম্প্রসারণে সরকার কাজ করে যাচ্ছে। জাতির জনক বঙ্গবন্ধু শেখ মুজিবুর রহমানের সুযোগ্য কন্যা ও বর্তমান সরকারের মাননীয় প্রধানমন্ত্রী জননেত্রী শেখ হাসিনার দক্ষ ও দূরদর্শী নেতৃত্বে দেশ আজ খাদ্য স্বয়ংসম্পূর্ণতা অর্জন করেছে। এ লক্ষ্য অর্জনের ফলে জাতির পিতা বঙ্গবন্ধু শেখ মুজিবুর রহমানের আজন্ম লালিত স্বপ্ন সোনার বাংলা বাস্তবায়ন সম্ভবপর হচ্ছে।

বর্তমান সরকার কৃষি খাতকে সর্বাধিক গুরুত্ব দিয়ে যাচ্ছে। দেশের কৃষি উন্নয়ন ও সরকারের কৃষি নীতি বাস্তবায়নে বিএডিসি ফসল উৎপাদনের বিভিন্ন উপকরণ সরবরাহ করে আসছে। এ লক্ষ্যে উন্নত জাতের মানসম্পন্ন বীজ উৎপাদন, সংগ্রহ, প্রক্রিয়াজাতকরণ ও বিতরণ, অটোসিড প্রসেসিং প্লান্ট, ডিহিউমিডিফাইড গোডাউন স্থাপন, রাষ্ট্রীয় চুক্তির আওতায় গুণগত মানসম্পন্ন সার আমদানি ও বিতরণ, সার সংরক্ষণের জন্য স্টীল গুদাম নির্মাণ, ড্রিপ সিস্টেম পানির সর্বোত্তম ব্যবহার, জলাবদ্ধতা দূরীকরণের মাধ্যমে সেচ দক্ষতা বৃদ্ধি, আধুনিক প্রযুক্তি নির্ভর রাবার ডাম, হাইড্রোলিক এলিভেটেড ডাম, পাহাড় এলাকায় কিরিবাথ, ডাগওয়েল, আর্টিসিয়ান নলকূপ, বারিড পাইপ, ফিতা পাইপ, ড্রিপ ইরিগেশন, নবায়নযোগ্য জ্বালানির মাধ্যমে সেচ সুবিধা কৃষকের দোরগোড়ায় পৌঁছে দেয়ার ক্ষেত্রে গুরুত্বপূর্ণ ভূমিকা পালন করে যাচ্ছে। যার ফলে বিএডিসি'র কার্যক্রম পর্যায়ক্রমে সম্প্রসারিত হচ্ছে। তিনি আরও বলেন, আমরা ২০০৯ সালে যখন ক্ষমতায় আসি তখন বিএডিসি ছিল মুমূর্ষু অবস্থায়। সেখান থেকে বিএডিসিকে আজকের এই অবস্থানে নিয়ে এসেছি। আমরা বিএডিসিকে মরতে দিব না, সুস্থ সবল করে তুলব।

দেশের কৃষি প্রবৃদ্ধি অর্জনে বিএডিসি আরও গতিশীল ও জোরালো ভূমিকা পালন করবে বলে মাননীয় কৃষি মন্ত্রী আশাবাদ ব্যক্ত করেন। উক্ত অনুষ্ঠানের সরকারের বিভিন্ন মন্ত্রণালয়ের উচ্চ পর্যায়ের কর্মকর্তাগণ, বিএডিসি'র প্রাক্তন চেয়ারম্যানগণসহ বিভিন্ন স্তরের কর্মকর্তা-কর্মচারীগণসহ উপস্থিত ছিলেন।

শেখ মোহাম্মদ সাইফুল ইসলাম
জনসংযোগ কর্মকর্তা
বিএডিসি, ঢাকা
ফোন: ৯৫৫২২৫৬
ই-মেইল: pro@badc.gov.bd